



DEO OPTIMO MAX.
UNI ET TRINO.



VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS
manè discutienda, in Scholis Medicorum, die Jovis 12. Novembris
M. DCC. XXXIX.

M. GEDEONE DE RABOURS,
Doctore Medico, Præside.

*An, in Luë Venereâ, parciore & longius distictæ Mercurii doses
plenioribus crebrioribusque antependendæ?*

I.



UES Venerea, priscis hominibus ignotum, nec ulli
ante annum circiter 1493^{um} visum, morbi genus ex
Americâ in Italiam delatum est; symptomatum sævitiâ
ferox, pertinaciâ difficile, origine turpe, similitudine
cum aliis morbis fallax, veneni subtilitate contagio-
sum. Quod utinam, cæteris immunibus, dignum
semper foret impuræ pariter & flagitiosæ Veneris stipendium! Sed

A

infantes etiam laceffit maligna morbi vis : quam à nutrice ad infantem, ab infante ad nutricem, quin, ab infectorum salivâ, sudore, halitu, ad sanos etiam aliquoties transfundi videas. Ab iis tamen ferè partibus sui notas venenum præbet quibus admissum est. Si itaque ab immundo (quod familiarius est) concubitu trahat originem, his ferè præluit principiis. Fœmina masve fuerit, ex genitalibus stillat, dilutiùs modò, modò saturiùs (pro maligniore vel benigniore morbi genio) virescens aut flavescens humor : quodque pejor ipsius indoles, eò major, post mictum imprimis, inæ urethræ ardor, & in viris, noctu præcipuè, molestior tentigo cum eodem doloris sensu ac si violenter contorqueretur coles aut funiculo constringeretur. Apparent in balano aut præputio ulcuscula, in convexa glandis lentiùs, in coronam & fræni viciniam celeritùs serpentina : quæ majora pudendorum labia internè, minora utrobique, vaginam atque os uteri internum, in fœminis, afficiunt. Hæc in utroque sexu, dùm recentia sunt, ejusdem planè speciei diceres ac si cutis ungue derafa foret, nisi quòd figuram quandoque circularem exhibent, atque sanie madent lentâ, lividâ, fatente, ex luteo-viridi. Est etiam ubi protuberent inguinum glandulæ, atque tùm ipsæ, tùm circumjectus adeps in bubones attollantur, qui modò resolutione, vel sponte, vel artis operâ, modò suppuratione, sed tardâ & difficili terminantur. Hi verò si naturaliter retrocesserint, vel *gonorrhœa* aut ulcuscula diutiùs (contemptis auxiliis) permanferint, lues ipsa solet succedere, quæ uti non omnibus semper, sed uno tantùm horum prægressis, ita rarissimè per se oritur. Quoquò autem modò id accadat, pululans in ano, glande, præputio, tumores, quos, pro figuræ vel magnitudinis ratione, porros, verrucas, mora, crystas, condylomata, ficos nuncupavère. Pustulis rotundis, subflavis, viscido quidem at paucissimo humore turgidulis asperatur corpus, earum familiar sedes in fronte, pectore, temporibus, dorso, femoribus internis. Quæ priùs ortæ sunt paucis diebus abscedunt in crustas *furfuraceas*, novæque iterùm in viciniâ efflorescunt. Densa quandoque, pro pustulis, & tenuissima pululat scabies, aut cutem deturpat *herpes*, à vulgari non aliter dissimilis, quàm quòd iisdem remediis non cedat, &, lapsu temporis, in fordidum ulcus, latiùs quàm profundius serpens, quandoque degeneret. Oris interna, fauces, laryngem, uvulam, tonsillas excedunt pessimi moris ulcera. Variis corporis locis, inguinibus putà, axillis, pone aures, sub maxillâ inferiore, glandulæ intumescunt, quæ nisi detumuerint, vetustate in scirrhos primùm, deindè in caneros, abeunt. Calvariam, reliqua ossa, periosteum, medullas ipsas, præprimis articulos, infestat, interdiù mitior, noctu

acerbissimus dolor. In tumores inæquales, dolorificos, ossa, maxime capitis & tibiæ, attolluntur, non rarâ *ankylosi* coeunt articuli, carie sic putrescunt ossa, ut levissimâ de causâ frangantur. Capite tandem defluere capilli, sedibus suis commoti dentes decidere, facies denique & corpus universum exortis & productis undequaque ulceribus horrendum in modum deformari. Adstantibus interim sibi quæ ipsi vix ferendum odorem spirat æger, & miseriam tandem ærumnas inter & cruciatus vitam exhalat. Febris plerumque abest, nisi fortè (quod aliquoties occurrit) spuria intermittens vel *phibiscos* habitum morbus induat. Sunt plures etiam alii, sub quorum larvâ se prodat, affectus, quos hic recensere supervacaneum. Liquida primùm in hoc morbo infici, ac deindè solidis partibus vitium communicari apud omnes Medicos convenit. At quæ sit *miasmatis* indoles, *alkalinis*ne an acidis salibus, an verò certâ utrorumque proportionem constet, veluti gravissimi momenti res ageretur, seriò à nonnullis disceptatum est. Id profectò agitentur quibus aut otium non desit, aut tantùm in proprio ingenio fiducia sit, ut nihil tam abstrusum reperiatur, quod solertia suâ retegere non possent existiment. Rectè abundèque (pro usu Medico) de venereo *miasmate* judicabit, qui ejus indolem ex effectibus simpliciter deducet. Illud itaque ex erosione partium mordicans, ex contagii facilitate & penetrandi vi subtile, ex tardo morbi decursu lentum, non temerè affirmaveris. Optimam verò ægrotis medicinam facies qui, lato eadem ratione de remedii viribus judicio, ipsum ad singulorum temperamentum & morbi magnitudinem moderare. Hoc igitur consequi studes? Inter varias quæ hætenus usu receptæ sunt adhibendi mercurii methodos, eam elige per quam, curationis decursu, quasi insensilem corpori mutationem inferas, nimis celerem vites.

I I.

PROMPTIOREM acuti morbi medicinam expetunt; non nisi lentam chronici patiuntur. Quâ ratione solidæ liquidæve corporis partes à statu naturali deflexerunt, eadem sunt reducendæ. Non aliam medendi normam videtur indigitasse rerum fabricator, dum anni tempora ita conjunxit, ne extremas statim mutationes corpora paterentur. Hyemem inter & æstatem medias duas, venièpè & autumnum tempestates interposuit, quæ declivem facerent ad oppositos cœli status prolapsus, quâ dispositione provisum est ne calori summo succedens frigus asperum, rarefactum sanguinem statim constiparet, neve summus calor brumale frigus excipiens, eundem densatum ad vasorum usque crepaturam dilataret. Duo

4

verò arguere hinc licet, 1^o. quantum à subitis oppositisque rerum effectibus œconomia animali impendeat periculi, deindè quàm securus sit ad opposita, modò sit insensibilis, transitus. Utriusque evidentius exemplum desideras? Inflammatum uterum cum eodem gravido confer. Ubi inflammatur, sanguinis rubra pars, copiam solito majore in arteriarum, tum sanguinearum, tum etiam *lymphaticarum* extrema, pulsa, si non absolute stagnat, saltem insigniter relentescit. Morbum hunc sequitur partis rubor, tensio, dolor, durities, augmentum. Uterum nunc maturo fœtu gravidum considera. Omnia ibidem, prout in inflammatione, præter dolorem, similia deprehendes. Imò tunc multò majore sanguinis copiam intumesceat quàm si gravissimâ, quæ tamen omninò abest, inflammatione tentaretur. Undè igitur adeò diversi effectus? A lentiore vel celeriore sanguinis in partem appulsu. Placidè nimirum in graviditate ad uterum allabitur, undè paulatim cedunt vasa atque ampliantur, in inflammatione confertim irrui, undè molestè distenduntur. Ratione non absimili, remediis ejusdem, prout variè usurpatur, adeò contrarii sunt effectus, ut salutem alteri, alteri necem inferat. Posset itaque *illic* aliquis, quam chalybis quantitatem in menses plurimos cum fructu potest absumere, eandem intrâ paucos dies sine noxâ sustinere? Posset *pleuriticus*, quam partitis vicibus sanguinis per sectam venam effusi jacturam utiliter facit, eandem unâ vice sine vitæ dispendio facere? Id sane nemo Medicus crediderit. Largissimâ & subitanâ sanguinis profusione idcirco collabascunt vasa, quia eâ celeritate constringi nequeunt, quâ fuerunt inanita. Hinc debilis aut ferè nulla cordis arteriarumque in sanguinem actio, corporis languor, lipothymia. Illæso contra cordis motu liquorumque circulo, sanguis liberaliter (modò interpolatis vicibus id fiat) profundi potest. Hoc pacto gradatim arctantur vasa, atque ita se recipiunt, ut conclusum intrâ se cruorem liberè propellant. En quanti in acutis (ut ut vehementibus & promptis auxiliis indigeant) ea ita moderari referat, ne nimis subito corpus immutent. Hanc verò medentis prudentiam quantò potiori jure sibi vindicant ii affectus quorum decursus diuturnior, si præsertim usurpentur medicamina quæ maximâ *energiam* polleant.

I I I.

HUJUS sanè generis est Luis Veneræ profligator Hydragyrus. Substantia est metallica, fluida, tactu frigida, saporis odorisque nullius, splendoris argentei, metallis omnibus, si aurum exceperis, ponderosior. Ignis vi dispersus facile avolat, sed quâmcunque dividantur ejus partes, globorum semper figuram retinent,

qui angustissimos corporis meatus faciliè subeunt. Cujus sit in sanandâ syphilide præstantiæ nemini non notum est; at quomodo agat in virus id planè ignoratur. Miram ejus potentiam, ab *alkalinâ* vel acidâ quam huic medicamento quidam tribuunt indole, deducere, æquè à ratione alienum. Si enim *alkalinis* constaret partibus, venenum non destrueret quod *alkalinam* esse potiùs argueret conciliata ab infectorum salivâ, syrupo violaceo viriditas. Ipsum acidâ qualitate agere non faciliùs probaveris, cùm, *alkalinis* salibus permixtus, nequaquam fermentescat. Hujusmodi disquisitiones sunt agitatu planè inutiles. Sed ut à mercurio prudenter adhibito optima præstari Medicum scire refert, ità ab ipso parùm cautè applicato funestissima symptomata excitari, non ignorari necessarium est. Hæc ex mercurialium globorum tenuitate, pondere, figurâ, potest deducere quivis Physicarum rerum non rudis. Non una ipsius intromittendi ratio, quarum unam alteri præstare, cave generaliter assignes; singulæ enim singulis, pro re natâ, sunt anteponendæ. Modò per cutis poros sub unguenti specie, modò per os pulveratus aut liquore aliquo suspensus mercurius, tandem in vaporem ignis ope resolutus per pulmonem aut corporis habitum insinuat. Quoquò modò corpus subeat, per exilissima venarum ostia recepti globuli, torrente sanguinis abrepti ad cor deferuntur, ad extremas usque arterias propellendi. At celeritatis gradum recipiunt eò majorem, quò gravius sunt, sub exigua mole, ponderis, ideòque facilem sibi viam patefaciunt, quia tenuissimæ *sphæricæ*, lævissimæque sunt. Ex his faciliè intelliges globorum affricu intendi solidorum motum, pondere & motu rapido, sanguinem & lympham attenuari, impulsionisque vi & velocitate extremarum arteriarum ostia reserari. Per varia igitur corporis emuntoria lymphæ profluit, modò per cutis poros, modò per intestina, renes, aut salivæ ductus, quod familiarissimum, in hoc casu, purgationis genus est. Ex his alterationem patitur corpus, quam lentiorē leviorēve facient quæ parçâ manu & longioribus intervalis distribuuntur, celeriorē verò nimiamque pleniores, quas vulgò solent adhibere, & crebriores mercurii doses.

I V.

DELATI ad cor mercuriales globi, truncum aortæ primùm; deindè ejus ramos & ramusculos, exilissimaque tandem vascula eâ proportionē subeunt, ut amplioribus surculis, plures, pauciores arctioribus admittantur. Tanta autem esto vasorum capillariorum exilitas, tantula verò primâ vice intromissi mercurii quantitas,

ut, factâ distributione, globum unicum, nec ampliùs, singula capillamenta receperint. Globi illi paulatim, ab instante sanguine, & placidè ad variâ corporis emunctoria, renes putà, intestina, cutis poros, aut oris glandulas propelluntur. Alterationem interea minimam ac ferè insensibilem tùm canaliculi, tùm contenti in ipsis humores patientur. Id novi solùm eveniet, ut & sanguis leviter dividatur & vasculorum orificia mediocriter dilatentur. Sic præparatâ viâ, post convenientia temporis intervalla, aliæ doses facilè poterunt admitti, mercurioque, vel per cutis poros, vel promiscuè cum cæteris excretionibus abrepto, paulatim venenatus humor domabitur. At si quid in excretionibus sensibilibus augeatur, commodè securèque feret æger, adeò benignè moderatèque id fiet. Tamdiù verò, sine noxâ, continuari poterit mercurii usus, quamdiù morbi pertinacia postulare videbitur. Audi nunc quàm metuenda sit nimis larga & frequens hydrargyrosis. Plurimi, ubi ea in usum vocatur, mercuriales globi in singula capillamenta distribuuntur, qui, à pone sequentibus liquoribus indefinenter pressi, eò faciliùs intricantur, quò exitum, propter numerum cum vasculorum angustiiis non congruentem, difficiliorem reperiunt. Turmatim progredi gestientibus valdè obstant ad fines usque remotissimos græscientes canaliculi. Ulteriùs ergò meare cùm nequeant, hærent, undè obstructio primùm, deindè inflammatio nascitur. Accensâ itaque febre magis ac magis percutiuntur globi, vascula tandem (quæ aliàs blandè dilatarentur) dilaniari necessum est, perque eas portas sanguinem erumpere, per quas lymphæ solummodò foret eruptura. Si præ aliis partibus caput impetat mercurius, fit sanguinis intrâ calvariam effusio, undè lethales apoplexiæ epileptique insultus, si pulmonem, sanguinis sputatio, si stomachum, ejusdem vomitus, si intestina, sanguinolenta diarrhœa, si vesicam aut renes, sanguinis mictus. Nec hæmorrhagia solum periculi genus est, quod indè pertimescas. Sæpè, integris vasculis, ità incuneatur, ut membranas dolorificè distrahat, prætereuntibus liquoribus ponat obices, spirituum animalium cursum (compressis nervis) intercipiat, partes ubique gravet. *Cephalæam* itaque, desipientiam quandoque, cæcitatem, lethargum, pectoris suffocationem, anxietatem, *anorexiam*, tormina, *dysuriam*, artuum tremores, *paralyfim* & infinita hujus generis mala excitat. Esto tamen, licèt magnâ copiâ intromissus nulla ex his invehat; at res est in eâ methodo optatissima, ut disruptis undique salivæ rivis, operosissimum crudelissimumque purgationis genus, salivatio oboriatur, quo, nonnisi vi tormentorum periculorumque pretio, defungi liceat; hujus initium, statum, declinationem undique circumveniunt in-

commoda; adventurum prægreditur palati, gutturis, tonsillarum, gingivarum, faciei, at linguæ maximè, quæ sæpè ore vix contineri potest, dolorificus tumor; præsentem comitant immunda foetidissimaque oris ulcera, penè præpedita deglutitio, & crudelis, propter uberem salivæ manantis copiam, vigiliæ perpetuæ necessitas; absolutam tandem consequitur summa virium imbecillitas, & hæcticorum similis marcor. Quid quod adeò pertinax quandoque contingit salivæ fluxus, ut, cum arte nullâ cohiberi possit, pertinaci jacturâ debilitati ægrotantes contabescant.

V.

PLENIORUM crebriorumque mercurii dosium ideò laus est: apud plurimos, quia uberrimo quem provocant salivæ fluxu virus abripi, infectamque totius corporis lympham cum novâ & puriore commutari credunt. Apage qui ita sentiunt! Adeò non in abnormi illo lymphæ dispendio consistit curationis perfectio atque securitas, ut, vel post uberrimam salivationem, permulti, lymphâ propemodum exhausti, veneni labem nequaquam eluerint. Imò nulla in morbi curatione peioris ominis res est, quàm salivam abundè ab initio prodire; promiscuè enim cum ipsâ, veneno intacto, mercurius effluit, cujus usum continuari vetat copiosior *ptyalismus*. Quominùs tandem existimes largam hujusmodi evacuationem esse necessariam, vide quàm paucâ excretionem sensibili prodeunte, solâ mercurii appositione, ulcusculâ venerea dissipentur. Vide quàm sæliciter, per extinctionem, quod aiunt, morbus radicatus à quibusdam Medicis tractetur. Per alvum tamen, vesicam, cutem, oris glandulas, solito plus humoris excerni, modò id salvis ægri viribus fiat, non improbamus, quinimò valdè utile judicamus. Qui enim lentè admodum (sub cælo præsertim frigidiorè) per solam transpirationem diffilaretur mercurius, citiùs faciliùsque, auctis paulisper cæteris excretionibus, è corpore abscedit. Hanc verò curandi rationem longiorem esse clamitent, plenioris crebriorisque *hydrargyrosos* fautores, modò tutiorem fateantur & commodiorem. Quosdam incassum sic tractatos à morbo non convalescere frustra objiciunt, cum suæ methodi vitium idem sit. At at nostram in eo præstare certum est, quòd in eâ nulli unquam, in alterâ permulti fato rapiantur. Neque si suam (quod tamen haudquaquam concedimus) tamen si periculofam, esse aliquandò efficaciorè contenderint, ideò primùm sequendam esse assentiemur. Nostra nihilominus tutiùs etiàm præiret, quæ si fortè foret irrita, quidni aliâ deinceps viâ insisteretur? Sunt equidem, nec diffitemur, qui etiam copiosè singulisque diebus adhibito mercurio, vix commoveantur.

At modicam alii quantitatem sustinere non possunt, quin plurima aut aliqua saltem ex iis quæ memoravimus symptomata experiantur. Diversa autem illa hominum ad mercurii vim dispositio, cum ex agrorum pulsu, facie, cæterisque aliis signis exterioribus, ne oculatissimis quidem exercitatissimisque Medicis dignosci queat, quænam erit exhibendi mercurii tutior methodus quam ea, cujus ope singulorum vires, sine periculo possis tentare? Hoc porro (præter alia permulta) in nostrâ est commodi, ut ex leviusculâ dosi tutò judicare possis, an altera augeri vel imminui vel differri debeat, tertiæ quantitatem & spatium secunda indicat, quartæ tertia, & sic de cæteris. Largiorum verò dosium, cum subitanea sint & prompta, pericula nusquam prævidebis.

Ergò, in Luc Venereâ, parciore & longius diffusæ Mercurii doses plenioribus crebrioribusque anteponendæ.

DOMINI DOCTORES DISPUTATURI.

M. Carolus Dionis.

M. Joannes Midy.

M. Joannes Herment, Medicus
Regis ordinarius.

M. Gedeon de Rabours, aëlitus
Præst.

M. Joannes-Jacobus Belleseste.

M. Jacobus Fourneau.

M. Laurentius Ferret.

M. Thomas-Renatus Gafnier.

M. Ræymundus-Jacob Finor.

Proponerebat Parisiis, JOAN. LUDOVIC. BAUDE DE LA CLOY,
Audomareus, Baccalaureus Medicus, A. R. S. H. 1739,
à sextâ ad meridiem,